

欽
定
全
唐
文

欽定全唐文卷三百九十一目錄

新文豐出版社藏書

獨孤及八

唐故特進太子少保鄭國李公墓誌銘

唐故衢州司士參軍李府君墓誌銘

前左驍衛兵曹參軍河南獨孤公故夫人韋氏墓

誌

殤子韋八墓誌

唐故潁川郡長史贈祕書監獨孤公第三子澄墓

誌

唐太府少卿兼萬州刺史賀若公故夫人河南郡
君元氏墓誌銘

唐新平長公主故季女姜氏墓誌銘

唐前楚州司馬河南獨孤公故夫人博陵崔氏墓
誌銘

唐司直博陵崔公故夫人趙郡李氏墓誌銘

唐萬年縣尉崔肅洌故妻李氏墓誌銘

唐故朝散大夫中書舍人祕書少監頓邱李公墓

誌

唐故大理寺少卿兼侍御史河南獨孤府君墓誌

銘

唐故正議大夫右散騎常侍贈禮部尚書李公墓

誌銘

唐故祕書監贈禮部尚書姚公墓誌銘

欽定全唐文卷三百九十一

獨孤及八

唐故特進太子少保鄭國李公墓誌銘

少保諱遵皇唐太祖景帝七世孫也祖瑜鄭州刺史追贈太常卿烈考日暈官至太僕贈太子太師揚州都督公聰朗奇偉豪邁曠達率性忠孝臨節有勇開元十年初仕天寶六年出守始於淄川歷濟南汝南以剛明莅衆所居政肅民受其賜生爲立祠十四年秋九月由執金吾爲彭原郡守明年長安覆沒元宗遜於南京便橋之役我師敗績

自新平屬之五原二千石皆反爲賊守莫有勤王者肅宗以餘騎十數次於彭原公頓首迎謁且憤且喜因獻衣服鞍馬泣問大計乃悉發倉庫募敢死士獲九百人公自誓衆扈蹕而北翌日師次臨涇又北至於平原收攜貳逆命者斬之以殉破其餘黨進幸靈武旬日之間有衆至數萬王師遂張於時法駕播越神器無主公與裴冕等率羣臣勸進陳天意上尊號以定民志上乃卽皇帝位拜公尚書工部侍郎領宗正卿乘輿南旋公封鄭伯舊京始復公典營建社稷宗廟園陵壇墀罔不畢修百工咸若乾元二年

論功行封策爲鄭國公定食實封二百戶加特進工部尚書宗正如故上每拜公相命將帥建妃后公悉參焉渥澤滂沱羔雁盈門家有陸生之橐樂兼魏絳之賜中興宗臣荷寵莫二會李輔國泄省中語且諷公卿舉已爲相公不從密陳其奸明年肅宗崩公由太子少傅貶袁州刺史竟爲盜憎且讒勝故也寶應二年拜鴻臚尋復加太子少保貶永州司馬大厯二年七月某日薨於永州春秋若干夫人盧氏蘄春郡長史諭之子以副筭宜室封范陽郡夫人而偕老僊願先公十二歲而歿大厯三年夏五月庚申合

葬於萬安山北原禮也惟公宣力殷憂之際克扶艱難之
業忘身衛上忠之至者及居職任事知無不爲永泰之後
以列侯朝請則放志違生以親其身再處左官皆非其罪
知公者謂公進因策勲退不附邪善無近名直而忘懷斯
可謂之達矣有四子謂誦諲諤願書其先人之勲烈使後
嗣子孫得酌而觀之於是公母弟祕書少監日勛謂及忝
佐典三禮宜知先王先公之昭穆故命及爲誌其詞曰
貞松之姿匪寒不知公之清規見於國危抗憤忠勤發民
濟師戮力扶義天步乃夷奄有滎波遂荒鄭封帝曰俞往

汝作共工澤流於家慶積恩重門羅軒蓋賜有歌鐘再謫
湘源謂當後笑遂遊岱宗天實不弔寂寞舊館淒涼江徼
琢石泉戶攜其光曜

唐故衢州司士參軍李府君墓誌銘

公諱濤皇唐太祖景皇帝六代孫也曾祖道立嘗典陝濟
陳三州刺史封高平郡王祖景淑畢國公父仲康官至尚
書主客郎中楚州刺史世秉懿德爲公族領袖語在皇室
譜公純孝忠厚貞信廉讓直而遜明而晦朴而不固靜而
應物克已復禮時然後言策名居官清畏人知弱歲好學

篤志經術專戴氏禮晚節耽太史公書酌百代之典故以
輔儒道以經明行修宗正寺舉第一初仕許州臨潁縣主
簿歷宋州宋城縣尉皆以恭寬信惠聞於千室議黜陟幽
明者謂公文行吏事宜登三臺會河朔軍興避地江表相
國崔渙承詔署衢州司士參軍於時五府辟召之權移於
兵間務苟進者多由徑而致顯位公儉德正志安貞俟時
未嘗以得喪夷險芥蒂方寸視榮辱晏如也論者高之乾
元二年某月日寢疾終於揚州春秋若干某月日權窆於
衢州嗚呼仁可以師表縉紳而無貴仕禮可以軌範風俗

而不遐壽沖用休績卷而未形溘焉化往使善人相弔嗚呼哀哉公歿後十有二載從父弟涵以宗室柱石爲御史大夫按節江東痛仁兄生不登公侯卿大夫之位歿不備踰月外姻至之禮遂茹哀筮日減月俸以庀喪具由是大厯九年夏四月二十七日公長子居介及居佐居敬居易奉公之輅柩歸葬於洛陽先使君夫人宅兆之側凡今孝乎惟孝友於兄弟者於此乎觀禮及謂知公者宜莫若懿親今將以無媿之詞申報幽路故作銘以刊之於石其詞

曰

天地方否君子安卑世道旣夷隙駒莫追仁而不壽才旣
無施積善必慶天何余欺檐檐裳帷泝江絕淮蒼蒼故山
玉樹斯埋死喪之威兄弟孔懷令德家風與天壤偕

前左驍衛兵曹參軍河南獨孤公故夫人韋氏墓

誌

夫人諱某字某楚王交傳孟裔孫唐許州司馬皎曾孫渭
南主簿懿之孫兗州金鄉縣尉商伯季女祕書省著作郎
睦州刺史儻之妹其先自彭城郡徙京兆從丞相賢後九
世至本州大中正穆始有東西眷之號二十五世至徵士

夏居魏周二代出不降志處不隨俗時人號爲逍遙公夫
人之七世祖也逍遙公生民部尚書建安公世恭建安生
上大將軍宋州刺史仁祚將軍生給事中旅卽許州之禰
也夫以四言之遺直一經之遺烈十徵之高風焯於古今
宜其秉哲垂懿百代不隕地之華望之崇與春秋之唐杜
范氏漢晉之袁楊王謝侔其熾大矣哉三十八葉之明德
茂祉降衷於夫人故孝慈貞儉溫惠淑慎文敏好禮三者
皆天機生知不待師訓而至廣德二年夏六月歸於我衣
服飲食躬自菲薄夙夜戒敬致孝於苻菜接娣姒以謙馭

幼賤以敬敦善勸義恕不知而矜不能喜怒未嘗見於容
止也其德禮所化宗族以睦兒童知讓生一子四歲而夭
大厯四年夏六月癸丑再孕不育乙卯歿於舒州春秋若
干仁厚而不福德備而不壽是天不惠於我家也向使錫
厥永年正家承筐宜爾子孫百祿是享非夫人曷歸啟手
足之日長幼號咷外姻內姻親疎皆行哭失聲也宜哉是
歲九月甲申以褱襖裳帷遷於洛陽十一月丁巳安宅兆
於舅姑先塋之西南隅恐時逝事遷景行不貽於後故刊
石以志卒葬且謹而日之

殤子韋八墓誌

殤子河南獨孤氏小字韋八以其弱而未名也故以字稱
北齊司空行臺尚書令臨川郡王七代孫有唐安南郡長
史府君之曾孫潁川郡長史府君之孫左驍衛兵曹參軍
公之元子祕書省著作郎京兆韋儼之甥生有奇表溫明
聰秀覃訐於保姆傅婢之手疑然異於凡童氣閑體和取
與必時諸父諸姑每謂興我家者必此兒也賓客之至者
看玉人不暇倘假以壽命則成器致位未易度也不幸多
病大厯六年歲次辛亥十二月二十二日天於舒州壽止

五歲三十甲子長幼惋毒六姻悼惜嗚呼天將不昌我後
裔乎不然曷使此孩不至於成歟大厯八年夏四月十六
日以其喪歸洛陽祔於王父母宅兆之側其仲父銜涕書
其始終記於墓云

唐故潁川郡長史贈祕書監獨孤公第三子愷墓
誌

唐天寶元年歲次壬午潁川郡長史府君第三子曰愷寢
疾卒於潁川至德二載冬十月四日權窆於洛陽龍門之
西山焉至大厯四年五月十有二日詔追贈潁川府君祕

書監是歲七月十有一日壬午遷宅兆於壽安祖塋甘泉鄉之原以君之喪葬於塋之左禮也君沈毅出於天成幼年性卽果斷岸然不可以屈撓資稟穎悟過目成誦若出之素得兼之好學不倦朝夕無廢時弱歲專於左氏春秋晰疑洞義二百四十二年之事若列之指掌尤工於畫尤善音律圖書之奧靡不深究津津乎神遊而趣洽所以爲之卽得其理意氣倜儻達節不欲以細行竊名志氣方遠未仕不幸多病年方二十二而歿嗚呼修短之經聖人罕論同塵顏冉茹恨何言嗚呼

唐太府少卿兼萬州刺史賀若公故夫人河南郡

君元氏墓誌銘

夫人諱某魏景穆皇帝九代孫也祖韓某皇朝贈太子少保父諱某克荷前烈不幸早世夫人在學而孤鞠育於叔父相國潁川公天機聰明生知仁孝被服法度綜習文史年十四嫁河南賀若璿璿積功勞剖符爲郡夫人輔佐以副笄宜室能睦其族且勸以義而風藻禮範儀刑閨門晚節厭離心垢嚴持禪誦而道機未宏壽量有極永泰元年三月某日終於渠州享年若干嗚呼以夫人之柔明孝慈

溫惠淑茂况承景穆之餘裕少保之貽則季父當國良人
專城河潤澤及福綏宜遠胡弗眉壽鍾是短歷潁川公之
慟其可既乎大厯二年二月二十二日反葬於京兆鄠縣
之某原宜列景行貽於彤史恐陵岸或遷音徽將沫故月
而日之銘諸堅石蓋猶父之志也其詞曰

人亦有言天祚明德吁嗟邦媛未偕壽域家節旣成蕙芽
方植仁而無報爲善者惑夜臺超忽神斯冥默貞石有磷
德音罔極

唐新平長公主故季女姜氏墓誌銘

乙巳歲四月二十六日有唐新平長公主季女姜氏卒於京師昊天觀五月六日葬於某原長公主歎季女姿度榮茂溫惠淑慎修女師之訓動中禮範其曾祖柔遠位至尚書地官侍郎祖皎以勲舊厯太常祕書剖符封楚其父慶初能踐修祖考之耿光嗣爵舊國復居太常元宗其外王父也肅宗其舅也天池波瀾澤潤本根謂德鍾下錫祉與壽宜君子家室且貽芳於彤管乃朱芾而天命也夫嗚呼窈窕專柔含德而未形雖當鵲巢小星采蘋殷雷之德今已矣夫史氏茂由記之矣長公主之慟其庸可及乎故

月而日之銘諸堅石焉其詞曰

思變季女生於公族稟懿德今天世其祿不遐其福胡不
淑兮彭殤同躅數不可續哀靡極兮

唐前楚州司馬河南獨孤公故夫人博陵崔氏墓

誌銘

夫人諱某博陵安平人也曾祖恭禮國朝駙馬都尉延齊
易三州刺史封博陵郡男祖興宗饒州長史考雋亳州臨
渙縣丞夫人少孤在家以純孝稱旣笄莊明而賢柔順有
識年若干歸於獨孤氏奉蘋藻供祭祀事長撫幼糾合宗

族敬恭而誠孝愛備至動必由禮非法度未嘗踐也生子
四人教之以義方夙夜貞勵家道以正娣姒服其義親戚
稱其慈天不降衷於我大厯八年十一月某日享年若干
歿於壽州少長行哭六姻涕泗傷夫人有宜室之美勸義
之明而司命奪其長算使德與壽反嗚呼哀哉明年十一
月日公使長男勣奉夫人之喪返葬京師某原先塋之側
禮也刊石以誌庶德不朽其銘曰

夫人之德柔明淑慎從夫以禮承筐以順奉若家節率由
彝訓遐福是期溘至何迅謂仁者壽天實不信同塵彭殤

歸根大運於以刊石永播淑聞

唐司直博陵崔公故夫人趙郡李氏墓誌銘

夫人諱某趙郡人也皇朝德州將陵縣令銛之長女天生
柔懿韶訖知禮年十六歸於崔氏丕承宗祀虔恭中饋謙
敬恭儉貞固淑溫閨門化之宗族以睦生一子年十一而
殤有女四人長女夭於襁褓次女適范陽盧履純第三女
適河南獨孤及年若干早世少女適樂安蔣鎮皆柔明好
禮淑慎有德循度勸義雖造次不違仁實夫人之教訓也
輔佐君子三十有九年夙夜靡違家道以正向使神祈正

直天報德善宜登期頤與君子偕老嗚呼不造春秋五十
四而歿凡所顧復太半道夭撒琴瑟之日無兒主祭德與
事反哀有何極嗚呼哀哉是歲十月某日卜宅兆於某山
某原追紀往行以志幽石禮也及忝婚姻之故常瞻清懿
逝歿相尋報德靡及敢不備書實錄期於不朽其詞云
莊敬柔順婦行之極抑抑夫人秉是懿德衿輦爲戒蘋藻
惟職四始之美六姻是式仁而必報當躋壽域天實匪忱
古今同惑變化忽恍音徽冥默關右遺範是效是則

唐萬年縣尉崔肅洌故妻李氏墓誌銘

夫人其先隴西人也皇唐高平郡王道立之元孫畢國公景淑之曾孫祖仲康開元中爲尚書主客郎中楚州刺史父濤以貞信篤行爲宗室冠冕歷宋城尉衢州司士參軍而歿德厚而位不稱啟手足之日爲守道者所痛夫人吾之姊子也稟氣於家君之中和母氏之柔明故姿度淑茂恭儉謙順天性孝慈聰慧有識讀書善鼓琴造次必以禮自持莫見其喜怒之容言歸於崔以德宜夫事姑禮節儀刑閨壺輔佐之美六姻是瞻有識者謂當有鵲巢之貴鮐背之壽天則反是使春秋二十七而終醫不至歟命有極

而然歟適來適去皆忽然歟吾痛且惑傷悼之不足故形於文且遂爲誌其文曰

爾德爾容天實爾鍾爾志爾年天何不從勸義孤望歸安跡絕哀哀母氏泣盡繼血刻字此石記爾芳烈

唐故朝散大夫中書舍人祕書少監頓邱李公墓

誌

公諱誠字元成魏郡頓邱人也九代祖誕魏太傅陳留郡王從太傅七葉生左威衛將軍翊左威衛生汾州長史昇長史生濮陽令諒濮陽生公四歲知禮七歲善屬文年十

六戶部尚書姚珽以賢良薦比之終賈開元三年舉進士
十年舉茂才十七年舉文學皆射策取甲科由太平尉爲
金吾曹監察御史河南司錄美原令膳部員外郎天寶元
年考功郎中知制誥修國史二年中書舍人五年祕書少
監七年十二月終於京師自初仕至終二十七年歷官十
享壽五十三動靜由禮交不詔瀆宏毅貞諒直而不肆居
官必忠執事必敬未嘗以悔吝改操爲權倖屈法由是自
御史爲河南府司錄持正不阿故也宰美陽周月收案大
猾除其根株然後布政及期而美陽無訟乃有涸泉湧流

白雀馴於庭開元中蠻夷來格天下無事搢紳聞達之路
惟文章先公以俊造文賦皆第一京師人傳寫策藁相示
以爲式無何司言載筆乃典祕書公才盛名高與職位俱
論者謂公以文學政事取公器如拾芥雖不至公卿其令
聞令望足貽後昆夫人孝義縣君宋氏萊州司馬元同之
女禮樂風操家之範也柔明孝慈天之質也清淨厭離修
之惠也能修采蘋之職以正家節李氏之閨門肅九族睦
實夫人是賴乾元元年隨長女從夫於洋州二年正月二
十五日終於某居享年五十七遂權窆焉路難不克反葬

故也有才子二人曰興曰殷悉能荷先大夫之德興三十
爲左補闕起居舍人殷舉秀才甲科永泰二年興請命於
上迎夫人喪至自洋州十月二十七日合祔於澠池先塋
夫惟天地能長且久若邱隴陵谷則無不遷者也故纂其
先人之景行勒於石以爲誌

唐故大理寺少卿兼侍御史河南獨孤府君墓誌

銘

府君諱璵河南洛陽人漢世祖光武皇帝第二子沛獻王
輔之昭也齊臨川郡王河陽道行臺僕射洛州刺史永業

府君五代孫國朝明威將軍文惠府君第二子越州都督
浙江東道節度觀察處置使兼御史中丞右金吾大將軍
峻府君之季弟也聰明仁恕專直寬信擾而殺溫而厲弱
冠筮仕以藝卽戎藏器安卑非其志也天寶十四年安祿
山反朝廷以淮淝海沂三吳咽喉宜擇良佐以貳藩鎮命
府君爲泗州長史無何換滁濠二州倅戎備參吏職忠敏
肅給所涖繫賴御史中丞崔公昭之尹河南也盛選僚佐
表府君爲太常丞兼殿中侍御史營田判官使罷轉湖州
別駕大歷五年崔公受詔持節牧宣歙池三州府君復爲

從事以太子右諭德兼殿中侍御史遷大理少卿兼侍御史方謂宜民宜人祿與壽俱遭命不淑春秋五十五而歿是歲大厯九年春三月二十四日也夫人隴西李氏以柏舟之誓提攜諸孤某等奉府君之喪言歸洛陽某月日窆於某原禮也府君少孤事兄嫂以友悌稱在邦在家言信行果居官祇事強志能力及其冠法冠佐太府上以勤恪周爰成務下以明誠勞謙應物和禮正家敦睦族姻自疏及親必慈必愛而命不我與年未下壽天天其掇嗚呼哀哉初府君之金吾伯兄擁旄浙東也拔崔公於郡吏之中

升爲軍司馬推誠委政之分猶晉得韓厥宋得子罕及中
丞之開府辟掾府君爲首旣而府君之喪也中丞哭之慟
贈賻賙給加於人一等由是稚子孀妻得奉喪而西三月
而葬禮無違者賻布之餘足備祭器君子謂金吾之明哲
詒厥兄弟宣州之交情見於死生知己之道斯其行者鮮
矣及敢不以直詞書仲父之美於墓石其辭曰

叔父懿德承家令儀惠迪哲兄踐脩靡違移治於官發跡
淮沂及佐皇華亦繡其衣天子命我再參軍機駱馬嘽嘽
所從其誰顯允君子爲諸侯師府君委質咨諏載馳式壯

其猷耄未及之陰陽爲寇子鵬洽期昔也陟岡哀哀永思
今也反真匪公曷依伯兮叔兮今乎已而他年九原公誰
與歸

唐故正議大夫右散騎常侍贈禮部尚書李公墓

誌銘

歲在丁未七月丁卯有唐故右散騎常侍李季卿薨享年
五十九文經邦國行滿天下無人非鬼責之悔以近後劇
無中人十金之產以補祭於身歿顧謂宗子家老必以巾
車一乘斂手足形還葬其孤馮翊縣令霸等泣奉遺命以

某月庚寅附宅兆於長安九陣原之先塋名公上士護喪會葬同道必至哀纏都邑初公烈考曰適神龍中歷官中書舍人昭文館學士工部侍郎才高而明爲文章著龜公生而好學地使然也豁然宏達天所縱也臨大節而賈勇不私其身也進賢不進不止事君以忠也當昔天步方艱王師有征公入參諫臣出佐軍政直躬咨諏戎臣賴之其後領二曹判二州再司王言三貳京尹由祕書少監爲吏部侍郎復兼御史大夫慰撫山東淮南明年勞旋典選如故大厯三年拜右常侍其勤王家十有餘年舉措由道行

止以直居貞守忠愆不能惑思賢求才若渴若飢推心吐
誠親疏以之執德之經不爲利回正進退於忠信視得失
如涕涕凡君子在位則不仁者遠攸徂之邦宜皆蒙福遽
奪公算是不惠於斯人也天難忱斯嗚呼哀哉諸公以爲
不可奈何者壽天之數若奮揚景行宜在知已由是尚書
右丞長樂賈至作銘以銘之

唐故祕書監贈禮部尚書姚公墓誌銘

有唐祕書監永安縣侯姚公諱子彥字伯英其先馮翊蓮
勺人也至高祖僧洪徙家河東祖思聰祕書少監父坦汝

州梁縣丞贈祕書監公忠諒孝愛寬仁愿恭質方氣沖天
所授也而力行博學溫故知新錯綜六藝以作詞賦初舉
進士又舉詞藻皆升甲科尉清苑獲嘉永寧三縣開元二
十九年詔立黃老學親問奧義對策者五百餘人公與今
相國河南元公載及廣平宋少貞等十人以條奏精辯才
冠等列授右拾遺內供奉厯左補闕於時天下無金革之
虞選多士命百官先文行而後名法而挂下方書南宮章
奏主張綸翰典司禮文尤精其選非盛名莫居由是遷公
殿中侍御史禮部員外郎禮部郎中知制誥中書舍人太

常少卿天寶十四年奉詔宣慰江東淮南覽觀風俗無何
二京陷覆太夫人捐館公外罹憂患內纏憊疾銜憤泣血
毀瘠滅性乘輿反正公適外除拜太子右庶子於時逆難
始康百揆草創官復其職人亦求舊俄又授公中書舍人
禮部侍郎光祿卿左散騎常侍加銀青光祿大夫復知制
誥廣德二年授祕書監以儒行懿德策名三朝遺跡故事
周徧臺閣資忠體和惟道是居正身奉上中立不倚恐懼
戒慎形於隱微故遭值傾否出入夷險而未嘗有悔名與
身偕德善是依明哲以保故也享壽七十有八大厯二年

四月某日薨於位五月某日詔贈禮部尚書知言者以爲
壽富康寧攸好德考終命洪範謂之嚮用五福而公居四
焉以清儉貽厥子孫故所不至者富焉爾非明德介祉何
以享茲有子曰驍曰驥曰驂曰駟曰驢號於昊天痛欲報
之罔極也銜恤問禮杖血褻事十月丁酉卜兆此原惟威
德與公器若川流之無還垂芳如之何刻銘於其墓之門
將以志不朽其詞云

恂恂祕書蘊粹含和服膺孔門行鄰四科遭時之康天下
尚文公奮羽翰翱翔慶雲晚逢中興貴德尚齒公秉懿範

入作卿士逮事三后出入二紀典禮司書媚於天子居貞
保儉與祿終始鬱鬱佳城烈烈餘美日月有逝令聞無已

欽定全唐文卷三百九十二目錄

獨孤及九

唐故尚書庫部郎中滎陽鄭公墓誌銘

唐故吏部郎中贈給事中韋公墓誌銘

唐故范陽郡倉曹參軍京兆韋公墓誌銘

唐故左金吾衛將軍河南閻公墓誌銘

唐故商州錄事參軍鄭府君墓誌銘

唐故號州宏農縣令天水趙府君墓誌

唐故天水趙琚墓誌銘

唐故給事中贈吏部侍郎蕭公墓誌銘

唐故銀青光祿大夫太子左庶子嚴公墓誌銘

唐故浙江東道節度掌書記越州剡縣主簿獨孤

丕墓誌

舒州山谷寺上方禪門第三祖璨大師塔銘

唐故潁川郡長史贈祕書監獨孤公第六子萬墓

誌

欽定全唐文卷三百九十二

獨孤及

九

唐故尚書庫部郎中滎陽鄭公墓誌銘

永泰元年六月四日尚書庫部郎中鄭公卒春秋四十有九知舊茹痛行路嗟悼謂公口無擇言身無擇行得乾之貞固損之元吉坎之常德明夷之正志宜荷福履俾如山阜而秩止於三百石年不及知天命明神豈予欺乎嗣子正藐然始孩孤窮何怙八月四日葬於先塋宗人家老於是乎以果行實錄貴於豐石禮也公諱寵字若驚滎陽開

封人也其先建國命氏有鄭世家言之矣大王父某澧州
司馬贈衛州刺史衛州生襄陽令某襄陽生臨汾令某臨
汾生郎中純懿休祉之所叢也貞亮忠厚仁讓孝敬融明
而溫性與道并二十舉明經高第解褐鄴尉太尉房公之
由鄴郡而爲右扶風也表公茂才擢號縣令號土狹而人
寡公用教化漬之謂任力不及任人聽訟不及使無訟故
以直宏道以信齊政以禮肅墮以讓息競莅止一歲號人
恥格至德二年拜監察御史徙太原戶曹領平遙令真拜
太谷其在晉如在號也詔書勞之錫以命服遷華原令拜

尚書工部員外郎而唐人晉人猶歌咏盛德願得公常居
其邦莫有由也太原守上其狀詔遷太原少尹未行轉庫
部郎中凡歷十官宰四縣一持斧而再起草其政先道德
而後刑法內精辨而外若訥戮力事上吐誠率下罔曲物
而直已罔拂百姓以干名聲惟畏清之知善之彰飲其教
者忻然樂康而不知其惠之所由生也與公遊者靡親靡
疎悉飽醇德而莫見其天機之弛張也其學而知者惟濟
南之書淹中之禮田何之易胡毋之春秋酌其微言以治
其身身之治移於閨門閨門之治移於官官之治可移於

金史卷之三
國而壽不可踰於域故位量未半良史無述焉自古有死
彭殤同途獨有其身歿而其名存乎故老之口此之謂不
朽不可以不識其詞曰

剛德干時道家所忌抑抑鄭公直溫柔毅衆人缺缺鄭公
見朴衆人昭昭鄭公若濁布政四邑四邑和樂雷震風偃
物亦允若御史執法郎官草奏鄭公莅止德音是茂於以
經術潤色王度宗族敘惇鄉黨歸仁孝謹之風萬石之門
兄也弟也天天申申善則無報天地不仁抑抑鄭公執德
之中生不近其名歿不隳其聲吁嗟乎鄭公

唐故吏部郎中贈給事中韋公墓誌銘

郎中諱元魯字穎叔司農少卿德敏之孫衢州刺史魯縣
康公璆之子天寶五載解褐尉邠州新平其後參佐使臣
者五入御史府者三一居專城六爲尚書郎大厯二年十
二月乙酉以吏部郎中終於京師靜恭里之故宅春秋五
十有五啟手足之日朋從僚吏親者踈者匍匐而泣奔之
如不及惟郎中寬靜博厚孝友貞儉朴而愿達而好禮氣
和以中而博之以文好惡嗜欲發皆中節以誠待人不務
智巧雅尚儉慎臨事則虛已應物與道弛張性若踈緩赴

急則慘怛之仁形於顛沛誦詩三百不以文自衒在官必聞未嘗近名尤樂閑曠每以邱壑爲已任機事嬰之而未遑也則公之歿也跡負其志壽違其德官屈其量君子以是三者思其人而哀其命公無允子以兄子某爲嗣大厯三年正月癸酉卜窆於舊塋初執事者議三府高選欲以給事黃門待公旣而弗及僉以爲恨至是詔贈給事中以褒美之且復其言也嗚呼渭水東注時與之俱音容緬然何嗟及矣公之從父兄曰元甫與公友愛之外有知己之道焉故天倫之戚加於人一等謂及忝仲氏之舅故使爲

誌云

言罕兼德勇不必仁文行忠信獨鍾於身凡厥正人旣富

方穀

闕

叶於極命故不淑結志方遠爲郎未老孰與若木

先秋而槁變化誰宰天地何物目不容瞬盛德如失昨日
容徽今如夢焉採君遺塵誌君新阡

唐故范陽郡倉曹參軍京兆韋公墓誌銘

永泰二年五月七日有唐故衢州刺史魯縣子京兆韋瑋
第三子范陽郡倉曹參軍諱元誠葬於少陵原先塋夫人
范陽盧氏祔焉從周禮也公少時爲坊州參軍歷襄州司

法試守棗陽縣令真授蒙城令凡五遷至范陽倉曹初安
祿山以范陽叛劫脅元元以殺整衆士之因官因居而困
窘顛躓墮園中者數千計凶威所及不死則污公掾吏也
在僞署伍中溷跡佯狂冀以病免盜憎之乃加害焉春秋
若干夫陽九厄會天地鞠凶燎火災岡玉石何訴是歲天
寶十五年也嗚呼人皆筮仕必以廉平公幹稱於州里人
誰無死死則名不辱志不奪不嚙盜哺以易其生生且不
苟其事親事君之禮不待史氏而自明矣在官必聞則居
家正身與朋友臨財之節可知矣有子曰彤龍鍾崎嶇於

險阻之中十年不克返葬哀有何極歲在乙巳冬某月始
跋涉太行恒山之路以公之喪至自某郡公季弟吏部郎
中元曾既得吉卜痛天倫之歡莫之追也願以兄之忠於
君恪於官友於家之德之美以播後嗣庶幾陵岸遷而德
音不磨謬以及爲習於禮者故使之爲誌其詞云

天地橫隕二象霾兮梟獍擇肉鸞驚懼兮明夷于飛罹其
故兮美玉寧折質不汚兮子子孫孫荷餘裕兮

唐故左一作右金吾衛將軍河南閻公墓誌銘

公諱用之遠祖曰文周昭王瑕之後也生而手有文曰閻

康王竒之命封閭城文四十五代孫滿仕後魏太祖爲諸曹大夫自馬邑家河南其裔孫慶在隋爲少司空慶生毘毘生立本立德唐永徽中立本爲中書令立德爲工部尚書立德生元邃以司空尚書之餘裕也官至澤州刺史邃生巨源常宰射洪有仁政射洪人咏歌之公射洪第二子也溫毅遜直廉恪寬信讀論語老子周易被服其教初仕彭州參軍常攝督郵一日糾案本州僣謬不法數十事太守徐知人以爲材後有詔擇舍人以公魁偉爽悟有醞藉乃登其選會戎侵我天子方愛人息戰將以辭讓屈之詔

公使西域以王命諭禍福戎人頓首請罪介馬不汗戈鋌不用而虜軍却遷右衛郎將知引駕仗金吾將軍李質上殿不解佩刀公呵下殿陞請按以法左右皆震悚自是環衛加肅先是有司以三衛執扇登殿引蹕公奏曰三衛皆趨悍有材力不當升階陞邇御座請以宦者代上曰可遂爲故事天寶二年冊拜公長女爲王子義王玼妃加公左驍衛將軍遷榮王傅初元宗懲諸侯王之國任事率多驕蹇不奉法度而人受其害故開元之後皇子皇孫雖荷封建之命未嘗離阿保之手悉無出宮閤任卿大夫者公以

爲王居深宮則傳相職廢上疏陳古義請諸王申輔導之
禮議雖廢格上以爲忠公已白首位爲將軍諸侯傳太夫
人尚無恙以銀印赤紱侍朝夕膳色難無違時人榮之太
夫人捐館舍禮五十不毀公泣血死孝旣免喪天子復目
以端士俾傳壽王加朝散大夫上幸溫泉經時未還宮京
師人望屬車咸懷怨思公獻四言詩十二章諷諫優詔褒
歎後遷左金吾將軍天寶十五載二京覆沒公爲虜所獲
明年戎師奔然後以初服歸至德二年十二月終於京師
春秋五十九夫人雍州司倉參軍博陵崔脊言之女專靜

冲懿慈惠而明用德禮以佐君子有古風烈亦天鍾其仁
不遠其算年若干月日歿於私第歿六載而公薨俱權窆
少陵原有四子寧寀宰宣以家之不造世故之無寧歲也
銜恤茹血不克喪事者九載廣德中寀以監察御史領高
陵令明年辭職始卜葬於故原吉乃歲在丙午十一月日
遷兆合祔焉嗚呼惟音形事業悉如化往獨陳迹與邱墓
存焉非金石則無以示久遠故表而銘之孝子之志也其
詞云

郁郁金吾洵美且溫事君之忠資於愛親以德資身其社

金定全月三
三十三
宜繁彼美輔佐儀刑閨門禮樂是悅孝慈是敦百歲之後
合德九原獨以令軌垂諸後昆

唐故商州錄事參軍鄭府君墓誌銘

公諱密字慎微滎陽開封人也初韓哀侯滅鄭羣公子奔
陳宋間始以國爲氏惟桓公武公之德盛故國除而其姓
彌大歷漢魏晉迄於今冠冕婚姻世莫與京公其裔也齊
中書監南兗州刺史諡曰平諱述祖公之六代祖國朝衛
州刺史府君諱某公之大王父也博州刺史府君諱某晉
州臨汾令贈太常少卿府君諱某公之祖禰也公貞方介

直勤而愛人初仕趙州柏鄉尉所蒞不過一扁而政行一
邑廉使省風俗至趙趙父老率吏人數千遮道稱公之能
識者韙公材且得衆滿歲歸洛陽家於鳴皋山南趣深險
以避安祿山之亂親故數百家攜老幼往依之公悉發實
窖無親疎皆仰給餓者窘者得公全活先是累歲力耕致
粟至千斛至是而盡談者稱公之義二京返正天子選賢
守相令長將蘇瘡痍之人殿中侍御史王政以公充賦拜
商州洛南令數月訟平賦均監察御史李椅殿中侍御史
王延昌御史中丞元公載並表言其狀詔書褒稱加公壽

王府戶曹參軍洛南如故無何遷上津令專知轉運水陸漕輓邦都移用賴公而濟徙大理評事商州刺史盧浦以公前後課績條奏遂以本官兼商州錄事參軍御史中丞王延昌表公才任御史奏未下會疾終於位春秋五十是歲廣德元年八月七日也其年權窆於商州夫人清河崔氏某之女生子雅弟幹大厯九年歲次甲寅十一月某日返葬於洛陽北邙山某原禮也公世業尚文伯仲皆才公尤深於詩言合麗則究緣情之美天性孝悌檢身端方居官廉恪其家道足以勸所不至者位止於中士壽不過知

天命命矣夫公母弟尚書刑部郎中宣祕書省著作郎寶
以其兄之德善授牘於及及跪讀三復敢以實錄刻石其
辭曰

緇衣之宜敝予改爲蔚彼明德蔭此本支乃公乃侯典則
是貽藁祉於公實生令儀試吏柏仁嶷然忠規清不奪節
剛不干時以道蒙難處險若夷臨財務施依者如歸匪愛
千鍾仁爲吾師亂已運開乃從繫維先禮後刑以牧焚嫠
商於之人家肥俗移督郵廷評九仞之資曷云不淑命天
功虧明畧未申貽痛所知吉凶匪忱今古同悲桐鄉之愛

懷縣之詩令聞禹禹子孫承之

唐故號州宏農縣令天水趙府君墓誌

府君諱令則字某天水人也其先造父實佐周穆有平徐
偃王之勲因封命氏至晉而大以成季宣孟之慶故化家
爲國及武靈而稱王語在太史公趙世家秦滅諸侯使趙
王嘉子公輔主西戎戎人懷之子孫因家隴西世爲天水
著姓其源遠矣曾祖元楷隋殿中監工部尚書淮安公祖
崇基國朝岐州郿縣令符璽郎右衛長史烈考慶逸正議
大夫許州長史府君長史第二子也好古博學涉獵百家

之言善屬文尤注意詩賦外剛毅峭直內溫良而仁率由天性果於行已起家幽州薊縣尉敏給強濟聞於河朔以直道事人忤幽州刺史張守珪貶封州開建縣尉遇赦遷建州建安縣丞稍移湖州安吉縣丞天寶九載選授虢州宏農縣令宏農甸服也地邇賦殷號爲難治府君治之如治家刑以肅淫怠德以哀鰥寡爲政期年邑民知方三年績成人無不均不安之患號人頌之解龜後貧無餘資因遊方河朔會天寶十五載幽都爲戎薦瘡鍾運明夷垂翼至德二載某月日遇疾終於某州春秋若干嗚呼民莫不

穀我獨百罹才如府君胡不朋三壽綏百祿而生世坎壈
歿身喪亂若之何不弔命矣夫夫人河南獨孤氏朝議大
夫汝南郡長史府君之孫武功縣丞府君之女明哲柔懿
實天生德結悅宜室四十有四載內修法度輔佐君子躬
勤慈儉以化閨門趙氏之家肥族睦繫夫人是賴有子若
千人訓以義方咸能被服文藝幹父之蠱使有德者必壽
夫人宜登期頤奈何不淑遽奪長算天實不信人烏徼福
大厯十年五月二日寢疾終於郿縣官舍春秋六十有七
嗚呼哀哉長子湖州安吉縣丞琪琪弟某官瓘蘇州嘉興

縣丞澄太子舍人兼京兆府郿縣令玕晉州臨汾縣尉珮
臨晉縣尉珣珣弟玘是歲秋八月某日奉府君夫人之喪
合祔於京兆某原禮也府君有集若干卷遐邇之志見於
詞矣若言行才業官族歲月非銘無以示後裔也故著於
石

唐故天水趙琚墓誌銘

琚字遙憐宏農令府君第五子厥生之初會府君先有封
州之役契濶萬里愛而不見故遙以字之太夫人顧之復
之訓視加等及長溫厚孝謹文敏好學美姿儀有材藝

金史卷之三
九十三
二
戊歲十月以櫛縫符總從府君涉河十一月卒於深州嗚呼未壻未祿天天是絕不見其成六姻所痛大歷五年八月某日葬於洛陽先府君塋之次禮也乃爲之銘曰

彭氏殤子其壽未易歎子之往死生艱蹟未如之何刻石以記

唐故給事中贈吏部侍郎蕭公墓誌銘

公諱直字正仲梁長沙王懿七代孫有唐御史中丞臨汝郡守諒之孟子聰秀英達忠敏孝敬志強體和才方而圓果於從政當斷不惑有妙用明識足以濟衆利物與朋友

重然諾見於一貴一賤之際十歲能屬文工書十三遊上
庠十七舉明經上第名冠太學二十餘以書記參朔方軍
事中丞府君之遇讒謫居也公亦播遷漢東移尉穀熟至
德二年乃由廷尉評授監察御史厯河南府戶曹京兆府
司錄參軍其後驟升尚書戶部庫部司勳吏部四曹郎自
殿中進兼侍御史中丞徐州刺史廣德元年中一歲四遷
更七職朝廷難奉使之選謂非公莫可故也永泰元年拜
太子左庶子大厯三年授給事中前後居官二十辟書記
支使判官副使行軍司馬貳使臣之車者八出入冠柱後

惠文冠者六所從之主則朔方元帥張懷欽汴州刺史李
彥允揚州刺史李成式戶部尚書李公恒故相國今戶部
侍郎第五公琦今相國黃門侍郎王公縉中書侍郎元公
載其人也當乾元上元中大憝未靜王室之安危惟方面
藩鎮是瞻公所佐之府必以忠力主畫疑謀危事談笑而
決刀筆之所加應機成務談者稱其多才初公居先公夫
人之喪外除猶毀其後母弟立卒公期不絕哭再期懸不
樂食不肉談者高其孝友人有緩急大小之請必儲必副
內姻外姻與所知之喪必匍匐而救之贈舍加於人一等

談者服其仁愛其爲庶子

一作至是
以爲庶子

給事黃門出入兩宮

優游三公間皆得其歡心方謂六卿九伯之位可坐而拾
命不我與天孤人望歲在丁酉二月二日終於靜安里正
寢春秋四十六談者歎其名與位與才與時四者皆并獨
壽不至時輩以爲痛三月二十五日詔贈吏部侍郎嗣子
策密莒羸然銜哀奉喪來歸冬十月甲午卜葬於洛陽龍
門岡先中丞塋之左禮也先其期論譔功烈以墓銘乞其
父友孝也余欲塞其孝思之誠故錄其實以志其大節不
欲華其文也銘曰

天地氣和靈芝吐葩德善下鍾才子承家爲言爲行是構
是荷天子謂公濟美忠文駱馬鐵冠俾佐使臣周爰海隅
撫循斯民往踐諸曹亦倅戎車一麾出守言隼其旗乃推
大典作摧銅樓復登明廬竹花梧葉棲食茲始曷云不淑今也
遄已萬里可到中途而止逝者如斯化往莫留瑤林瓊樹
零落山邱匪石之貞曷紀德休

唐故銀青光祿大夫太子左庶子嚴公墓誌銘

皇唐太子左庶子河內縣子馮翊嚴公諱損之故都督洮
州諸軍事洮州刺史協之孫贈太常少卿方約季子中書

侍郎挺之母弟家之慶天之休鍾於公躬故其德備少仕
昌世遇權臣惡直官不登三臺晚值多難安貞不競故位
不過郡守宮尹前後佐兩衛參四府領二縣典七州再入
石渠三升龍樓凡處任十八享年七十六未嘗以利苟合
違道從欲用之則行見機不俟動靜允迪勞謙有光廣德
二年六月二十五日終於襄陽是歲八月權寔楚山西原
冢子曰式官至江陵少尹不幸道夭仲子曰士元由殿中
侍御史爲尚書虞部員外郎少子曰士良領祕書著作郎
悉能裕父蠱懿文德取公器他日獨立訓所至也大厯三

年歲在戊申五月二十九日返葬洛陽先塋禮之至也宗
人故太常卿向嘗狀公往行貽諸有司謂公外寬內剛廉
正篤敬溫而不厲直而不訐學究原本行有枝葉故其適
道求友莅職任事覈其實不居其華初公宰汜水也以莊
明慈惠爲政汜水人不敢欺而戶口增倍獄訟衰止御史
中丞蕭隱之以狀聞公是以有著作郎之拜其後歷太原
上谷弋陽餘杭丹陽雖風俗殊異治效如一不曰才乎公
在清池會安祿山與當國者交惡公曰難作矣遂移疾請
告奸黨惡之是以有弋陽之貶貶之明年河北爲戎不曰

智乎涉患難不辱身踐祿位不徇名居義處順動罔違害
不曰貞乎嗚呼榮問素業與時皆逝可稱也而不可追也
今採其實錄刻石示後蓋欲報罔極者之志也其辭曰
君子之道容民畜衆公宰二邑二邑無訟與國共理惟二
千石公七剖符七著成績乃師國子司成望苑考藝較德
以弼三善中和其心正直是踐道亞羽翼名掩春華忠以
事君孝施於家粲粲令子鮮侔晨葩若何不弔盛德旣喪
音徽永沫士友孤望千載九原遊者悽愴

唐故浙江東道節度掌書記越州剡縣主簿獨孤

丕墓誌

皇唐故潁川郡長史贈祕書監河南獨孤公遷宅兆於壽
安縣甘泉鄉之原公第五子丕陪葬於塋之西序第三兄
澄墳在右第六弟萬墳在左三穴齊列如平生侍立之序
禮也丕字山甫少聰明有志操好學博古年十五能屬文
祖述典謨實而不華有古人風采至若探綜圖緯推步六
甲昊天厯象太乙之奧悉究其趣尤好黃老之道與脈藏
榮衛之數奉之以爲衛生之經每餌藥煉氣謂丹砂可學
乾元二年從季父峻爲御史中丞都督江東軍事盛選僚

佐表爲剡縣主簿軍書羽檄悉以諮訪觀其志氣遐遠沖
然有騁長途致青雲之勢不幸短命臥疾累旬卒於會稽
春秋纔二十有三位不過部從事其宏識明畧真氣妙用
藏於身而未行世無得而稱之矣嗚呼哀哉是歲乾元三
年歲在己亥秋九月也臨歿歎曰孝道以冀全真策名期
於顯親未中道二志俱棄命也夫是月也殯於雷門之南
先夫人壽宮之傍行已十年反葬此宮無兒可以主祭悲
孰甚焉故月而日之以備朽壤灑淚紀德哀罔有極

舒州山谷寺上方禪門第三祖璨大師塔銘

右淮南節度觀察使揚州大都督府長史兼御史大夫張
延賞狀得舒州刺史獨孤及狀得僧湛然等狀稱大師遷
滅將二百年心法次第天下宗仰秀和尚寂和尚傳其遺
言先朝猶特建靈塔且加塔冊諡大師爲聖賢衣鉢爲法
門津梁至今分骨之地未霑易名之禮伏恐尊道教盛
典猶闕今因肅宗文明武德大聖大宣孝皇帝齊忌伏乞
准開元中追褒大照等禪師例特加諡號兼賜塔額諸寺
抽大德僧一七人灑掃供養冀以功德追福聖靈中書門
下牒淮南觀察使牒奉勅宜賜諡號鏡智禪師其塔餘依

牒至准勅故牒大厯七年四月二十二日牒中書侍郎平章事元載門下侍郎平章事王縉兵部尚書平章事李使司徒兼中書令使

唐故潁川郡長史贈祕書監獨孤公第六子萬墓

誌

萬潁川長史府君第六子性專靜內敏有幹局多才藝嗜學好古誦老子莊子之書究其大畧罹於多難未遑筮仕乾元三年夏六月與昆弟同侍板輿將如吳遇疾歿於楚州春秋二十九七月殯於廣陵山光南之西大厯四年五

月詔贈潁川府君祕書監是歲七月壬午奉遷神座令祔於壽安縣甘泉鄉之原先是萬之喪至自廣陵是日陪葬於塋西隅禮也夫維天壽之數雖聖智所無奈何今刻石志美亦以冀其名之悠久也